

匏翁家藏集

一
二

匏翁家藏集
卷之二

PDG

匏翁家藏集卷第七十五

墓表一十三首

封承德郎工部都水清吏司主事徐公墓表

公諱諒字公信蘇之長洲人其先爲嬴姓後封於徐因以國氏在周有偃王避難投會稽再傳章禹爲吳所執公族子弟散之徐揚二州間事載韓文公偃王廟碑蘇於禹貢屬楊於漢屬會稽故多徐氏代有聞人不絕然自公近世皆隱於農無顯者其所居在邑東南當震澤吳淞二水匯爲瓜涇而田其上相傳以爲業公幼而端重如成人資更穎敏父曰文質善士也初教以學書旣通其意再以九數之法授之凡所謂方田粟布之類人所未易通者習之輒精遂以其藝爲閭里所知宣德末朝廷遣中貴人浮海入島夷取奇物凡一藝之良者皆選以從公在

選中竊以母老憂幸而事寢則時方以足食爲事故工部尚書
周文襄公初至吳中巡撫求能濟其事者訪于郡縣得公厚遇
之一時征斂轉輸之法詢及田野而取於公者爲多公感激亦
竭所能事之世謂文襄善理財賦如唐劉晏公之贊助有焉大
臣繼是號能稱任必守其法者以公嘗事文襄率訪之比歲公
益老不任事而亦辭矣公年十三喪父事其母陳撫其弟瑄孝
友兩盡平生質實無矯飾尤以信義自持至老好聞善有所得
必謹錄之三子曰淵源澄敎之有法嘗恨少孤廢學俾務其大
者無以一藝成名其後源以明經竟登進士第爲兵部屬澄游
鄉校且有聲而公亦從受封曰承德郎工部都水清吏司主事
用源初官也當 命下公與其配任安人同拜于庭下命服煌
煌鄉人方羨之未幾而公以疾卒矣其卒爲成化十八年三月

丁亥享年七十有四計至兵部君將歸卜其年十一月壬寅葬于吳縣陂陂鄉堯峯之原乃來請其友吳寬文其墓上之石而泣告曰自吾官于朝吾父數遺書教以忠謹清慎其說不一今手迹宛然皆未能行也而吾父溘焉棄世非子誰慰吾之悲者寬敬諾蓋公則沒矣至其老而貴吳人皆曰公嘗有力於文襄文襄嘗欲薦以一官不果宜其終得之也噫此殆知其淺者夫吳中財賦甲天下雖尋常之地主撮之粟悉籍于官參錯填委之間而弊所由起者倚是而營其身家之私其人可數公豈特惡此不爲其助文襄立法而陰有德於人蓋多矣不然彼之營私者身且不保尚何貴之云而況澤及其後人矣乎此可以爲驗者則予表于其墓豈徒順其子孫之情哉所以勸乎人者意亦有在

贈承德郎刑部江西清吏司主事陳公墓表

華亭陳一夔與予同官于朝相好甚公暇過予談詩輒欣然忘歸他日與其友趙栗夫至則其容戚然言欲發且止已而栗夫爲言曰一夔之父母不幸俱沒而葬久矣未有表其墓者今者自咎不早爲圖使先德泯焉不顯敢介僕以請於是二夔乃起而拜予固重二夔者而一夔乃復不忘其父母如此不又可重乎其何忍拂之狀曰陳氏世爲華亭人其先曰慶四者居郡城之南胥顧渚之陰生鼎亨生文德生守仁爲同里張氏贅壻生以言即一夔之父也其諱綸字以言別號怡筠少侍外舅伯玉宦游會稽及長而歸適父當就逮京師徒步從之時永樂間朝廷營建未已被罪者例發工作即以身代備歷艱苦人不能堪而處之自如鄉里稱其孝後父母繼亡居喪盡哀以陳氏舊

業不可廢也始還自舅家貴而居之有矣弟縉既沒無子而多
貲又其居城西市中或謂可據而有也不聽曰吾豈利其死者
鄉鄰或之用度嘗貸其米不償則曰歲方歉非索逋時也後竟
焚其券初代父工作時每露臥因得喘疾後非春秋時即深居
不出日惟焚香賦詩以自適其詩幼學于里儒沈師聖已有妙
司及壯猶以舊習未忘時寫其興致而已其讀書能通太義至
諸史所載事實則多所記憶云生于洪武乙亥某月某日卒于
天順壬午某月某日以明年某月某日葬俞塘北原配江氏早
卒繼陶氏能相其夫成家每夜紡織達旦不休平生見寸帛亦
拾而藏之不忍棄以其子向學往往節縮日用以供其師友之
費其勤儉如此生于永樂某年某月某日卒于成化己亥某月
某日合葬俞塘則卒之年某月某日也子二人長圭善書藝不

仕坎章即一變以進士歷官刑部郎中嘗以先任考最獲賜
勅贈其父官而陶氏爲安人 恩典盛矣而復圖此陳氏子孫
其尚有考於斯以嗣其德也哉

文林郎大庾縣知縣夏府君墓表

府君諱俊字人傑姓夏氏世爲崑山人而居吳閭門西久矣家
當市廛中里鄰之人爭習爲賈公視其子璿璣有妙質獨教之
業儒擇經師徧令從學而資給之甚厚曰吾固不賢於世俗之
厚於嫁女者耶他日璣登進士第歷知應城新淦大庾三縣遂
擢監察御史而璿以太學生亦授州判皆府君之教也御史君
初爲縣有循吏稱 天子褒及其親於是府君獲封文林郎
大庾縣知縣當是時御史君方仕于 朝府君自吳中迎來適
遇 恩命偕其子拜受 闕下人莫不美之其御史君引疾家

居極侍養之樂者幾二十年而府君年九十四而終實弘治六年二月十二日也府君質莊重言笑有時事父母孝母榮氏性嚴率其妻承順無違母常病危禱于神願同茹素三年以延其生母病果愈尤有厚德女兄之夫仕于外以百金託之歲久持還封識如故嘗買一商物旣而酬其直商誤以為酬矣不納府君曰若何善忘耶卒強納之其年旣高節序賓客滿門子孫侍側宴飲終日歡然無倦容至語及其親然輒流涕不樂耳雖重聽入夜猶能燈下觀書而步履更健人所以美之者不獨以貴也府君之先俱不仕曾太父貴一大父文達父季益世有積德其配沈氏柔慈儉勤稱賢里中先三十九年卒贈孺人子男四長即璿娶李氏次即璣娶周氏封孺人次玉娶吳氏次衡娶陳氏繼吳氏璿衡俱先卒孫男四曰節曰武曰學曰道女六曾孫

女二以卒之明年九月十二日葬于吳縣橫山陳灣村先塋之次御史君使人持狀來請文表于墓上噫其何以表之惟御史君自入官以來以清德見推於人固其有以自立亦府君有成之也乎聞之府君就養新淦時邑多富室無一人敢造其門請謁者且子因得盡施其公平之政而亦以此不悅于人遂調任而去然其名則益以起矣向使府君有幾諫之失且遺辱其子能成其賢完然一節至於久而不渝耶此人所以美之者徒得其外之可見者耳夫發其潛著其幽使其德昭然于人此表墓之文所當作也

封文林郎廣東道監察御史林公墓表

惟林氏之先為魯人後避晉永嘉之亂散居南土有諱適者仕為福清尉始家于閩適生仲雅仲雅六子長曰高宋屯田員外

郎再徙吳中譜稱平江房其季尚有子建任大理寺丞大理之
子升兵部侍郎兵部之子真卿江陰司法八傳至誠山公之曾
大父也大父曰清隱父曰貴和貴和通易善卜筮之說國朝
永樂間五從中貴人泛西海入諸夷邦往返輒數年竟無恙考
終于家自誠山以來皆不仕至公生二子曰符登進士第仕至
廣西按察使而林氏復顯公以符貴被勅封監察御史者幾
三十年壽八十三以弘治九年六月十七日卒公諱昌字士隆
號守軒生未暮其父行役于外祖母范氏出魏國文正公之後
知書善教公遵奉不懈旣冠謀以養親卽出授徒故工部侍郎
吳公復時知吳縣重其名延教諸子後永嘉葉錫以庶吉士來
繼其任廉潔無私初建義學禮請居師席待之甚厚而公亦自
重未嘗輕造縣門諸生誠服皆自以爲得師公學不爲浮靡之

習朝廷有纂脩事遣官下吳中郡守輒請公預焉及公年益高凡行鄉飲禮輒居賓僕之位起居拜揖不失禮度其與人處不好謔浪飲酒雖至醉其貌愈謹與弟士明相友愛見宣聖裔孫鏞孤貧好學察其器識非終困者以女弟妻之後鏞仕至都御史有賢名轉工部侍郎而沒教其子必業儒符自御史再擢至按察使官亦尊矣公不自侈大及符以公事降知南雄公亦無愠色終日怡然賦詩飲酒如故人無不歎服者娶長洲夏氏封孺人賢行克配以弘治八年正月二十四日卒享年八十一子男長即符娶范氏亦出文正公後次節承事郎娶王氏女一嫁儒士劉潮孫男六原震原復原益原升原泰原鼎女四曾孫男一女一公前卒二年自爲葬銘及是以卒之年十二月十一日葬于高景山之原合夏孺人兆二子以予有交親之好復請

表于墓上予讀公銘文竊見其叙世系述事行詞質而核乃據而書之嗚呼里中耆老淳實如公者不可得而復見矣然受榮封享高壽子孫蕃盛如公者亦豈得哉是宜書之以示永久

施孝先墓表

施氏長洲舊族也家尹山之傍在國初科舉法未定詔選富民入官有初命爲方岳牧守者號曰人材施之先曰景仁時在選中遂知閩之建寧孝先之曾祖也祖尚義繼被薦用從事戶部未仕而沒父思繼娶薛氏生孝先其諱述孝先字也少游郡學勤勵謹飭力欲取科名以素嬰俯疾乞歸田間而命其仲子悌代之俾從師問學入則誨之甚嚴期無忝家世悌竟登鄉舉中歲復以家事付長子愷愷尤能服勞家再裕而孝先益晦蹟林下自號遁菴坐臥一室藥茗左右日以調攝爲事雖親友

亦不多接見也弘治甲寅年七十以十二月二十一日終于正寢配陳氏先十六年卒子男三人長即愷娶張氏次即悌娶吾氏次曰忱娶顏氏女一人先卒孫男十一人元吉元祥元祐元祚元振元善元享元慶元亮元貞元福女六人將以卒之又明年丙辰十二月十七日葬于其里之先塋悌以予與其先人舊識持狀乞表于墓狀稱其父重厚端慤不好爲智巧與人交言則必信凡聲利汾華一切屏去至於誠恪見於追遠孝謹竭於事生尤可道者噫是足以表矣乃循孝子之意書之夫自科舉法行士之游于學校者孰無干祿之志及其出而仕也然能保其名全其身者亦不槩見也以孝先之隱處較之其得失何如哉因併書之

明故封南京太醫院判周公墓表

公諱南字尚正姓周氏自號菊處其先鄆陵人也有爲兵馬駢
韞使者從宋南渡始家于吳子孫累世皆以醫仕曾祖曰光澤
縣訓導瑾祖曰太醫院醫士黼考曰處士鼎娶某氏生公初其
先專攻帶下醫至公兼通諸家言吳中論名醫公必居其列其
用藥不取奇效然人賴以活者爲多有疾者雖百里之外亦來
迎治亦惟其不計利人尤感之公爲人和厚衣冠隨俗不爲詭
異杯酒對客酣笑藹然平生不好爭競以忍自喜人卒服其德
少有孝行母病瞽日暮躬自扶持所以承順之者無所不至有
異母弟撫愛不衰子庚喜業儒不強以醫業庚顧以醫被召典
御藥禁中竟以其官封公爲南京太醫院判初庚無子欲以從
弟良之子繹爲子及庚卒公遣人入京師抱繹歸家而庚始有
後公年八十二以弘治丙辰五月十六日卒當疾甚召家人處

後事井井不亂且言吾當以某日逝矣已而果然其明爽如此
配閭丘氏封安人生庚庚娶陳氏繼娶顧氏贈封竝安人三女
嫁馮宇高直湯璠孫男一即繹女一贅陳鍵於是卜卒之明年
某月某日葬公于吳縣沙涇村之先塋鍵率繹來乞表墓道予
以公之卒非特生者之悲而已庚有文而孝死必不瞑不能無
望於此獨無以慰之乎且公已衰病嘗肩輿過予以生壙之記
爲託予旣許之又二月而公遂不起又無以慰之乎故書此于
石俾刻之

仰府君墓表

長洲仰氏吳中名家也曰大理寺丞諱瞻者仕于中朝爲良
法吏府君則大理公之長子也其諱高字惟高別號遜菴幼好
學稍長侍其父居京師將以書藝薦用以疾弗遂則歸治家事

益樹產業教諸弟絕無仕進意嘗是時河東薛文清公為大理卿得罪中要其父亦被誣同下獄遂謫戍雲中凡六年府君不憚勞苦數往省之道過京師輒訴冤于當道者當道者固知其父冤也相與言于

上得召還遂復其官居三年其父竟請

休致府君力奉養以娛其老且遣其子璿入府學圖嗣宦業璿後得濱州同知復分祿奉養之作居第于封門外日享其樂於是府君年益高以書遺其子曰吾旦莫人耳汝其歸哉璿即日告歸蓋明年府君以壽終實弘治九年十月二十二日也春秋九十以明年某月某日葬于某處娶卓氏思南府同知某之女先十二年卒子男二長琮義官娶崇明縣醫學訓科劉季成女次即璿娶四川參議周賢女女二長適太醫院判陳公賢次適夏永孫男四曰瀚曰溥曰灝曰濱女二適沈麟王雲雲縣學生

曾孫男二女一府君平生讀書喜吟詠既老康強不衰凡郡中行鄉飲禮必預賓席及年八十以恩詔有冠帶之榮有司復奉酒肉養老于家況有子仕而能致其養歸而能送其終可謂難得者矣銘曰

蔚溪之陽曰有一老壽樂而康惟其行孝逮其終身亦獲其報生際其時死得其所嚮用之福尚踰其數嗟何憾哉全歸茲土

贈徵仕郎戶科給事中楊公墓表

公諱信字仲實別號樗老姓楊氏蘇之吳縣人其先累世家崑山自公爲常熟周氏贅壻再徙吳城西當濠上居貨執藝比屋而是四方商人輻輳其地而蜀艫越舫晝夜上下于門其地旣爲賈區業殖者必精悍少年始善籌筭取息而公處其間謹愿無能人也惟服勤持儉如在田畝時與人貿易人亦無忍欺